



Sesida dals

Communitgà ils

Protocol nr.

26 da zercladur 2018

27 da zercladur 2018

522

Incumbensa Tenchio

concernent l'introducziun d'ina assicuranza naziunala da donns da terratrembels

Resposta da la regenza

La ristga da terratrembels è la ristga da donns elementars la pli gronda en Svizra. La ristga è da chapir sco probabilitad ch'in eveniment capita multiplitgada cun la dimensiun dal donn. La probabilitad ch'i capita in terratrembel da l'intensitad VII e pli gronda è fitg pitschna (ina giada mintga 500 onns en Svizra). Perquai che l'eveniment capita fitg darar, èsi anc pli difficil d'assicurar quel. In'assicuranza naziunala liass bler chapital da l'economia publica (tranter 10 e 30 milliardas francs). Per segirar in eveniment fitg rar stuessan vegnir fatgas retenziuns da fitg lunga durada u stuessan vegnir pajadas premias da reassicuranza. En quest lieu stoi vegnir rendì attent che differents assicuraders privats porschan a las proprietarias ed als proprietaris d'edifizis interessads in'assicuranza da donns da terratrembels.

In'enquista represchentativa da l'assicuranza d'edifizis dal Grischun realisada l'onn 2012 ha mussà che mo circa in quart da las proprietarias e dals proprietaris d'edifizis avessan interess vi d'ina assicuranza obligatorica da donns da terratrembels. En il rom d'ina enquista che l'assicuranza d'edifizis dal Grischun ha fatg l'onn passà ha la mesadad da las proprietarias e dals proprietaris d'edifizis beneventà in'assicuranza da donns da terratrembels, però cun l'idea da premias fitg bassas.

Dapi l'onn 2000 èn vegnidas inoltradas differentas intervenziuns sin plaun parlamentar. Cun excepziun da la moziun dal cusseglier naziunal Fournier da l'onn 2012 èn tuttas vegnidas stritgadas. Er a l'iniziativa dal chantun che Basilea-Citad ha inoltrà ils 10 da zercladur 2015, n'è betg vegnì dà suatientscha cun il conclus dal cussegl naziunal dals 20 da settember 2016 e dal cussegl dals chantuns dals 15 da december 2016. Dals scleriments che la conferenza da las regenzas chantunalas ha laschà far ils chantuns areguard la realisaziun d'in concordat è resultà ch'il dumber da chantuns ch'è necessari per cuvrir almain 85 pertschient dals edifizis assicurads e da las valurs materialas assicuradas da la Svizra ch'i dovra per realisar il concordat, na po

betg vegnir cuntanschì. Correspondentamain ha la conferenza da las regenzas chantunalas desistì da laschar elavurar in sboz da concordat correspondent.

En vista als fatgs ch'ina part dals chantuns refusa in'assicuranza obligatorica nazionala da donns da terratrembels ed en spezial ch'i n'è betg vegnì dà suatientscha a l'iniziativa dal chantun Basilea-Citad d'avant bundant in onn, na vegn l'inoltraziun d'ina iniziativa analoga dal chantun Grischun strusch ad avair dapli success.

Dal votum dal cusseglier dals chantuns Stefan Engler dals 12 da zercladur 2018 (nr. 14.054) en la sessiun da zercladur 2018 dal cussegl dals chantuns resulta, ch'igl è vegnida fatga ina nova proposta ch'eliminass ils dischavantatgs da la "assicuranza obligatorica" (premas charas per las proprietarias ed ils proprietaris e bler chapital lià sin reserva). Quai è ina furma da responsabladad solidarica che obligass las proprietarias ed ils proprietaris d'edifizis da pagar ina procentuala maximala da las valurs d'assicuranza en ina tala obligaziun finanziaria pir en cas d'in terratrembel. Cun per exempel 0,7 pertschient da tut la summa d'assicuranza da la valur da nov d'in edifizis en Svizra pudessan vegnir garantidas prestaziuns da circa 20 milliardas francs. Sin basa puramain matematica stuess la proprietaria u il proprietari d'in edifizis cun ina summa d'assicuranza d'in mez milliun francs pagar mintga 500 onns 3500 francs per cuntanscher ina garanzia da 20 milliardas francs en tut la Svizra. Quest pajament stuess dentant vegnir fatg mo, sch'in eveniment capitass efectivamain. Talas propostas ston vegnir examinadas pli detagliadamain. La regenza vegn a perseguitar vinavant la discussiun davart talas propostas ed ad examinar detagliadamain quellas, cur ch'i èn avant maun resultats concrets. Cur ch'igl è uschè lunsch, vegn il schef dal departament da giustia, segirezza e sanadad er a preschentar la tematica da nov a la conferenza da las regenzas en fatgs da militar, da protecziun civila e da pum-piers (CR MCP).

Sa basond sin questas consideraziuns propona la regenza al cussegl grond da refusar questa incumbensa.



En num da la regenza

Il president:

Il chancelier:

Dr. Mario Cavigelli

Daniel Spadin